

# 儒道貫

濠縣朱奉閑意防撰  
盧龍李鐵梁雨孫纂

## 第一章 道卽禮也

### 第一節 道字釋義

說文。道。所行道也。論語。孔子曰。誰能出不由戶。何莫由夫道也。夫出必由戶。則行必由道。道既與門戶爲比。固當爲道路之道。人之所必由也。故孟子告子下曰。夫道若大路然也。荀子儒效篇曰。道者非天之道。地之道。人之所道也。陸賈新語慎微篇曰。道者人之所行也。夫大道履之而行。則無不能。故謂之道。孔子曰。道之不行也。言人不能行之。董仲舒春秋繁露天地陰陽篇曰。人道者。人所共由。樂而不亂。復而不厭。揚子法言問道篇曰。道也者通也。無不通也。道若塗若川。塗讀若途車航混混。不捨晝夜。中庸道不可離。鄭康成注。道。猶道路也。是聖人之所謂道。總爲人所必由之道路而已。至中庸曰。率性之謂道。淮南齊俗訓曰。率性而行之謂道。則謂此之道路。乃順人天性而行者。若不順人之天性。則不得爲人之常道。視只言道路。爲進一解。荀子大略篇曰。立大學。設庠序。脩六禮。明十教。所以道之也。管子君臣上篇曰。道也者。所以導民也。導與道同。蓋有此道路。而後教導。乃引伸之義。若道之本義卽道路。人人可能解而不可離也。道之易也如是。而不能人人皆爲有道之人者。乃不知由。不肯由。或由之而不知。或知之而

不免或出或入也。夷狄安故俗。不知由也。桀紂任私智。不肯由也。百姓日用而不知。由之而不知也。士志於道。而有時歧誤。或出或入也。故至道者鮮。如論語曰。七十而從心所欲不逾矩。中庸曰。不勉而中。不思而得。從容中道。荀子勸學篇曰。神莫大於化道。則乃聖人之境。聖人者。並非其道高遠難知。難於從容與道化耳。

乃後儒誤解聖人之道。而混於釋老。道本平也。而抗之使高。本狹也。而拓之使廣。本實也。而鑿之使虛。本近也。而推之使遠。聖人明明示人以所以爲人之道。而偏欲說此道也。能如何生天生地生萬物。而入於微瀾玄虛。夫論語孔子曰。蓋有不知而作之者。我無是也。莊子齊物論曰。六合之外。聖人存而不論。是以刪書斷自唐虞。夏殷之禮。歎杞宋之不足徵。人事稍遠。其慎也如此。豈容以爲吾有大道。爲天地萬象主。若是荒誕不經也者。而朱子語類卷十三賀孫錄曰。道者古今共由之理。自天地以先。羲黃以降。卽是這個道理。又卷六十二雷錄曰。循萬物自然之性之謂道。又可學錄曰。天命之謂性。率性之謂道。伊川謂通人物而言。如此既變道路之道。爲道理之道。又上推之未有天地之先。旁拓之而兼人物。試反而按之語孟六經。何嘗有此。又語類卷十三卓錄曰。前日正與學者言佛經云。我佛爲一大事因緣出現於世。聖人亦是爲一大事出現於世。上至天。下至地。中間是人。塞於兩間者。無非此理。須是聖人出來。左提右挈。無非欲人有以全此理。而不失其本然之性。故聖人以其

先得諸身者。與民共之。只是爲這一個道理。如佛老窺見這個道理。莊子神鬼神帝。生天生地。釋氏所謂能爲萬象主。不逐四時凋。他也窺見這個道理。只是他說得驚天動地。聖人之學。則其作用處與他全不同。此朱子認爲聖人之與釋老。根本道理相同。而其作用處。全然不同者也。不思世間任何學術。必先有其根源理想。而後發爲作用。理想作用。同條共貫。果其道理同也。而其末流之作用。斷然不至有出世入世相差之遠。後儒誤將根源混同佛老。此道之所以難明。經之所以難讀。須知聖人者。人之聖入。並非物之聖人。聖人之道者。人之道。並非物之道。聖人言性者。人之性。並不彙物之性。雖聖人法天。道出於天。乃以天爲法。並非聖人之道。能生天地。聖人道出既有天地以後。釋老道立未有天地以前。此其範圍界畫。必須入手分清。故依孔子孟荀陸賈董仲舒以下。釋道爲人所必由之道路。實其大端也。

## 第二節 孔子以禮爲道老子以無爲道

儒道第言孔氏之學可也。而又與老子區別何也。夫自漢武表章六經。迄清季尊儒之甚。試執而問聖人道爲何道。雖白首老生。恐亦未易脫口解答。此則有宋大儒之過。亦即唐作五經正義之過也。蓋自孔子歿後。百家並起。多采孔老之學著書。中更秦火。漢初又尙黃老。自一二純儒大師外。儒道兩家。如涇渭合流久矣。又讖緯起於哀平。東京尊信。讖不足道。緯書

影附道家。雜引孔子六經之說。實有不可廢者。魏晉祖尙玄虛。以王弼何晏爲首。而其易注論語集解。亦最有名當世。迨唐孔穎達作五經正義。遂直以老子之道。爲孔子之道。遠而漢魏如彼。近而唐人正義又如此。所以宋儒講學。誤執道家太極。倡爲道學。直至今茲。尙有莫知其非是者。非自孔老源頭。比類而析言之。則欲言儒道。實無入手之方也。

夫孔子道在六經。六經道原於易。孔子贊易。實述義文。而老子乃用其名詞。大變先王之道而反之。老子曰。道生一。一生二。二生三。三生萬物。淮南精神訓曰。夫精神者。所受於天也。而形體者。所稟於地也。故曰。一生二。二生三。三生萬物。高誘注。一者元氣也。生二乾坤也。二生三。三生萬物。天地設位。萬物乃生。今按易曰乾爲天。坤爲地。天地一陰一陽。其數爲二。而生二之一。高誘曰元氣。元氣者。王符潛夫論本訓篇曰。太素之時。元氣翳冥。未有形兆。萬精合并。若斯久之。翻然自化。清濁分別。變成陰陽。陰陽有體。實生兩儀。天地壹鬱。萬物化淳。是天地未生時混沌之氣。即老子所謂一也。天地有形。而元氣則尙未有其形質。但既有氣。已非純然無形。故治道言者。亦曰一爲有形之始。向上推之。天地者元氣所生。元氣何由而生耶。蓋當生自然而生。故立一以代元氣。即老子曰。有物混成。先天地生。吾不知其名。強字之曰道是也。道既由自然而生。自然能不謂之道乎。故道立於一。又曰道生一。又曰。人法地。地法天。天法道。道法自然。自然功用。起於虛